

Želimo više kroz EU integracije

Tokom prvog dijela 2009. godine, nevladine organizacije iz Bosne i Hercegovine organizirale su i realizirale deset javnih debata širom zemlje. Ove rasprave su imale za cilj da doprinesu kvalitetnom javnom dijalogu između civilnog društva i domaćih vlasti o pitanjima i zahtjevima prema BiH koji proističu iz procesa EU integracija, a koji su od značaja za svakodnevni život građana.

Debate su održane pod pokroviteljstvom specijalnog predstavnika Evropske unije (EUSR) u BiH, uz podršku Češke Republike, koja predsjedava Evropskom unijom, i u saradnji sa Direkcijom za evropske integracije BiH. Ambasadori zemalja članica EU, šef Delegacije Evropske komisije kao i EUSR uzeli su aktivno učešće. Ove aktivnosti su dio nastojanja da se EU perspektiva Bosne i Hercegovine promovira u široj bosanskohercegovačkoj javnosti, a koje je EUSR započeo u proljeće 2008. godine.

U događajima je učestvovalo više od 700 predstavnika civilnog društva, pretežno nevladinih organizacija, omladinskih asocijacija, studenata i učenika, podmladaka političkih stranaka, stručnjaka i poduzetnika. Uz dodatno učešće relevantnih domaćih vlasti, debate su predstavljale vrijednu priliku da građani i vlast zajednički razmotre mogućnosti i izazove procesa EU integracija. Uticaj ovih događaja je, zahvaljujući domaćim medijima, došao i do šire javnosti. Predstavljani su jasniji i snažniji zahtjevi civilnog društva prema domaćim vlastima da se osigura brži napredak prema EU.

U ovoj brošuri se nalaze specifični zaključci i preporuke sa debata, a koje su NVO-i javno predstavili Predsjedavajućem Vijeća ministara BiH 18. juna 2009. godine.

Ključne preporuke sa debata uključuju:

1. Ispuniti preostale uslove za liberalizaciju viznog režima;
2. Kreirati politiku zapošljavanja na nivou BiH, sa posebnim fokusom na mlade, te uključiti sve relevantne aktere u taj proces;
3. Oformiti Socijalno i ekonomsko vijeće na nivou BiH;
4. Ojačati državne administrativne i finansijske kapacitete koji bi se bavili poljoprivredom, prehranom i ruralnim razvojem, uspostavljanjem ministarstva na državnom nivou;
5. Odlučiti o Nacrtu državnog plana za poljoprivredu i ruralni razvoj, uključujući uspostavljanje bosanskohercegovačkog fonda za poljoprivrednu proizvodnju;
6. Uvesti standarde znanja i ocjenjivanja u predškolsko, osnovno i srednje obrazovanje;
7. Razviti i usvojiti sveobuhvatnu energetska strategiju; ojačati sektoralni administrativni kapacitet, uključujući uspostavljanje državne agencije za okoliš;
8. Usvojiti državni zakon o okolišu kako bi se stvorio okvir za usklađenu politiku zaštite okoliša za cijelu zemlju;
9. Usvojiti i primijeniti Zakon o zabrani diskriminacije;
10. Razviti i koordinirati kvalitetne statističke podatke na svim nivoima; poboljšati rad Agencije za statistiku BiH.